

玉

海



040

1000.85

34893

通鑑地理通釋目錄

浚儀王應麟伯厚甫

卷一

歷代州域總敘

卷二

歷代州域總敘

卷三

歷代州域總敘

卷四

歷代都邑攷

卷五

十道山川攷

卷六

周形勢攷

卷七

名臣議論攷

卷八

七國形勢攷

卷九

七國形勢攷

卷十

七國形勢攷

卷十一

三國形勢攷

卷十二

三國形勢攷

卷十三

晉宋齊梁陳形勢攷

卷十四

河南四鎮攷

東西魏周齊相攻地名攷

唐三州七關十一州攷

石晉十六州攷

太極肇分。天先成而地後定。天依形。地附氣。地囿于天者也。而言地理者。難於言天。何爲其難也。日月星辰之度。終古而不易。郡國山川之名。屢變而無窮。是故圖以經之。書以緯之。仰觀俯察。其用一也。虞書九共。先儒以爲九丘。其篇軼焉。傳于今者。禹貢職方而止耳。若山海經周書王會爾雅之釋地。管氏之地員。呂覽之有始。鴻烈之墜形。亦好古愛奇者所不廢。然

諸儒之傳注異歷代之區寓殊禹之九河班志僅得其三商之八遷孔䟽未聞其四漢水東西之分積石大小之辨荆山之於荆豫梁岐之於冀雍潛在荆者未見蔡在圻內者未詳三江九江五邦三亳則書之說異焉還之爲營。彌之爲坵以著爲齊地以韓城爲涿郡自土之爲自杜倭遲之爲郁夷騶虞之爲梁鄒二南之爲南郡南陽則詩之說異焉揚紆在冀而爾雅以爲秦。盧水在濟北而康成讀爲雷漳水之爲潞吳山之爲嶽五湖混於具區潁湛列於荆浸此職方之疑也豫章在江南而江北之地未知中牟在河南

而河北之地難攷。許田魯地而非近。許鄆鄭邑而非
鄆。陵穀小穀之有別。父城城父之不同。此春秋之疑
也。二地而一名者。若王城葵丘酒泉貝丘鍾離之類。
一地而二名者。若白羽夾白夷垂葭發陽之類。方城
細柳丹水之有三。塗山歷山東陽武城之有四。瞻彼
洛矣。與東都之洛異。導洛自熊耳。與宜陽之熊耳殊。
首陽空桐新城石門石城丹陽白沙硤石之屬。其地
非一。畢萬之魏。爲河中之永樂。而以元城爲大名。失
矣。自廬振廩爲襄陽之中廬。而以合肥爲廬。國失矣。
潘岳賦西征。不知成師之曲沃在河東。韓臯論廣陵。

散不知魏之楊州治壽春韓文公南陽人在河內之
脩武而誤曰鄧州史記鄖關在漢中之長利而誤曰
洵陽杜子美詩三奇戍在彭州之導江而誤改曰三
城荀卿蘭陵非常州也孔明渡瀘非瀘州也公琰屯
涪非涪州也公瑾赤壁非黃也元規南樓非鄂也郢
都白雪誤於郢州東海二踈誤於海州以塗山爲會
稽以蓄桑爲采桑以大別爲安豐以東陵爲廬江以
楚丘爲成武以街亭爲南鄭襲訛踵繆不可殫紀漢
沔一也而或二之吳會一也而或一之江統誤鄩於
沛郡皇甫謐誤商丘於濮陽顏師古誤邛都於邛州

青衣於嘉州。南陵於宣州。注文選。不知夷庚。注本草。不知沙苑。博見彊志者。猶或失之。舊蹟湮沒。如濟絕于滎。碣石淪于海。昆明鑿而鎬京爲池。隋城立而漢都爲苑。南北僑置。如青有太原。豫有廣陵。六合之爲秦郡。項城之爲秣陵。玉門之爲會稽。尋陽在蘄而移柴桑。當塗在濠而寓姑孰。郡名非古。如雲之雲中。平之北平。薊之漁陽。縣名非古。如京兆之武功。豐州之九原。皆非秦漢之舊。或若異而同。或似是而非。不可謂博識爲玩物而不之攷也。余間居觀通鑑。將箋釋其地名。舉綱提要。首以州域。次以都邑。推表山川。參

以樂毅王朴之崇論。欲議稽左氏國語。史記戰國策。通典所叙歷代形勢。以爲興替成敗之鑒。大易設險守國。春秋書下陽彭城虎牢之義也。河湟復而唐衰。燕代割而遼熾。述其事終焉。若昔對白題羊腸帝丘。內黃問松亭柳河者。以該洽見稱。今豈無其人乎。孤陋寡聞。未免闕誤。以俟博雅君子。山河不改。陵谷屢遷。亦以發檻古之一慨云。上章執徐歲橘壯之月。子王子書通釋後。

有

典

樂

通釋

通鑑地理通釋卷第一

浚儀王應麟伯厚甫

歷代州域總敘上

神農九州

春秋命曆敘云、人皇氏分九州、神農始立地形、甄度四海、東西九十萬里、南北八十一萬里、周禮疏云、自神農已上、有大九州、柱州、迎州、神州之等、至黃帝以來、德不及遠、惟於神州之內、分爲九州、騶衍云、中國名曰赤縣神州、赤縣神州內自有九州、禹之序九州是也、中國外如赤縣神州者九、乃所謂九州也、有裨

海環之一區中爲一州。如此者九有大瀛海環其外。淮南墜形訓云。天地之間九州。東南神州曰農土。正南次州曰沃土。西南戎州曰滔土。正西弇州曰并土。正中冀州曰中土。西北台州曰肥土。正北濟州曰成土。東北薄州曰隱土。正東陽州曰申土。帝王世紀云。諸子稱神農王天下。地東西九十萬里。南北八十五萬里。愚謂河圖言崑崙者。地之中。釋氏言日月照四大洲。卽騶衍之說。此莊子所謂存而不論者也。

黃帝九州

禹貢釋文。周公職錄云。黃帝受命。風后受圖。割地布

九州漢地理志云黃帝旁行天下方制萬里畫地分
州得百里之國萬區晉地理志云黃帝令鯀步自
東極至于西極五億十萬九千八百八步帝王世紀
云黃帝推分星次以定律度自斗十一度至婺女七
度曰星紀之次今吳越分野自婺女八度至危十六
度曰玄枵之次今齊分野自危十七度至奎四度曰
豕韋之次今衛分野自奎五度至胃六度曰降婁之
次今魯分野自胃七度至畢十一度曰大梁之次今
趙分野自畢十二度至東井十五度曰實沈之次今
晉魏分野自井十六度至柳八度曰鶉首之次今秦

分野自柳九度至張十七度曰鶉火之次。今周分野自張十八度至軫十一度曰鶉尾之次。今楚分野自軫十二度至氐四度曰壽星之次。今韓分野自氐五度至尾九度曰大火之次。今宋分野自尾十度至斗十度百三十五分而終曰析木之次。今燕分野自天有十二次。日月之所躔也。地有十二分。王侯之所國也。愚謂通典云國之分野。上配天象。始於周子。世紀所云。蓋以星官之書。自黃帝始也。

顓帝九州

冀。兖。青。徐。揚。荆。豫。梁。雍。帝王世紀云。顓帝所建。帝嚳

受之孔子稱其地北至幽陵南暨交趾西蹈流沙東
極蟠木是以建萬國而制九州通典亦謂顓帝置九
州葉氏云祭法共工氏之霸九州也其子曰后土能
平九州則九州之名舊矣幽陵幽州交趾交州流沙在沙州西蟠木東海度索山上有屈盤桃木

舜十二州

冀兗青徐揚荆豫梁雍幽并營孔氏曰禹治水之後
舜分冀爲幽并分青爲營馬氏云禹平水土置九州
舜以冀州之北廣大分置并州燕齊遼遠分燕爲幽
齊爲營漢地理志云堯遭洪水天下分絕爲十二州

禹平水土。更制九州。列五服。與孔馬之說異。愚謂舜
典言肇十有二州。咨十有二牧。而後命禹平水土。當
以漢志爲正。鄭氏謂分衛爲并。燕以北爲幽。分齊爲
營。朱氏謂分冀東恆山之地爲并。又東北醫無閭之
地爲幽。又青之東北遼東等處爲營。而冀止有河內
之地。今河東一路是也。劉氏云。冀州之域大於九州。
於是分爲幽并。以此二州北扞夷狄。使不得接於王
畿。書大傳虞夏傳云。此十有二州。注。此域也。爲營域。
以祭十二州之分星也。

五服